

## EN PAULUJ A KIJIN LIKAU KARIAU ON MEN TEJALONIK.

<sup>1</sup> PAULUJ o Jilwanuj, o Timoteuj *on* momodijou en Tejalonik me ren Kot Jam atail, o atail Kaun Iejuj Krijtuj. <sup>2</sup> Mak o popol *jan* ren Kot Jam atail o atail Kaun Iejuj Krijtuj en mi re omail! <sup>3</sup> Mak eta jen poden danke Kot pweki komail, ri ai kan, pwe omail pojon kin laudela kaulap, o omail limpok pena pwaida kaulap. <sup>4</sup> I me kit juai kin komail *on* momodijou en Kot akan pweki omail kanonama o pojon ni omail kalokolok o kamekam, me lel *on* komail. <sup>5</sup> Iei me kajanjal pan kadeik *pun* en Kot, komail ap pan kon *on* wein Kot, me komail kamekamki. <sup>6</sup> Pwe me *pun* ta *on* Kot en depukki *on* irail me moromorouo *on* komail. <sup>7</sup> A komail, me kalokolok, pan *ian* kit meleileila, ni kajale pan Kaun Iejuj *jan* nanlan *ian* japwilim a tounlan manaman akan, <sup>8</sup> Janjaldo ni kijinia iumpumpul, kapukapun *on* irail me poponjaja Kot, o *on* irail, me jo peiki *on* ronamau en atail Kaun Iejuj Krijtuj. <sup>9</sup> O me pan lokidokilan kamekam joutuk *jan* mon *jilan* en Kaun o *jan* mon a manaman linan. <sup>10</sup> Ni a pan kotido o linan kila japwilim a jarau i kan, ni ran o, o ujun kin ir karoj, me pojonlar i, pwe komail kamelele atail kadede. <sup>11</sup> I me je kin pil poden kapakapa kin komail, pwe Kot en kotin kakonekon komail *on* paeker o a kotin kaerela omail kapunlol o kapwaiada wiawia en pojon ki manaman. <sup>12</sup> Pwe mar en atail Kaun Iejuj Krijtuj en kalinanada re omail, o komail en konekonla re a duen mak en atail Kot o atail Kaun Iejuj Krijtuj.

## 2

<sup>1</sup> JE men poeki re omail ri at akan iran atail Kaun Iejuj Krijtuj a pan kotin pwarado, o atail pan peukedalan i,

<sup>2</sup> Komail der wukiwuk jili o der wapon kida nen eu, de kajoi pot, de kijin likau, me dene kit kadar won komail, me dene ran en Kaun o mier. <sup>3</sup> Jota amen en kotau komail la ni meakot. Pwe ran o jota pan pwarado, lao wiawia en maj more wei jan, o aramaj en dip janjal la, nain me jued. <sup>4</sup> Me pan palian meakaroj o kajapwilada pein i, en ileila jan karoj, me udan Kot de men kaudok kan, A pan mondi nan tanpaj en Kot o mome on pein i Kot. <sup>5</sup> Komail jota tamanda ni ai mimi re omail, i katiti on komail mepukat? <sup>6</sup> Ari met komail ajaer, me meakot mia, me kin kapwandela a pan pwarado. <sup>7</sup> A rir en japun kan ap mur pwaida met. Ari jo, a mimieta me kin kapwandela, lao a pan poioki wei jan; <sup>8</sup> I anjau me likin kapun o pan janjaleda, me Kaun Iejuj pan kotin kame kila an en jilan i, o kawe kila linan en a pan pwarado. <sup>9</sup> I me pan pwara kido mana en Jatan, ianaki manaman o kilel akai o kapuriam ni likam kai. <sup>10</sup> O ianaki widin en japun karoj on irail, me pan lokidokila, pwe re kan limpok on melel, pwe ren dorela. <sup>11</sup> I me Kot kotin mueid on irail ni manaman jued eu men kapin ir ada, pwe ren kamelele likam. <sup>12</sup> Pwe karoj pan pakadeikada me jo kamelele majan melel, a me mauki me japun. <sup>13</sup> A mak eta, jen danke Kot anjau karoj pweki komail, ri ai kompok kan, o pwe jan nin tapi o Kot me kotin pila kidar komail on maur potopot ni jarau la pan Nen o ni pojon melel o. <sup>14</sup> Pwe on mepukat a kotin molipei komail er pan at ronamau, pwe komail en pwaij aneki linan en atail Kaun Iejuj Krijtuj. <sup>15</sup> Ari ri at akan, tenedi on o apwali padak, me komail padakkier, ma jan ni kajoi de at kijin likau. <sup>16</sup> A pein atail Kaun Iejuj Krijtuj o Kot o Jam atail, me pok on kitail o kupura don kitail kamait joutuk o kapor mau pan mak, <sup>17</sup> I en kamaitala monion omail, o katini komail on ni wiawia mau karoj o padak.

## 3

<sup>1</sup>ARI ri at akan, komail kapakapa kin kit, pwe majan en Kaun o en pwaida o linanla duen a wiauier re omail. <sup>2</sup>O pwe kit en japedokala jan aramaj jolelapok kan; pwe pojon kaidin pwaij en aramaj karoj. <sup>3</sup>A Kaun o me melel, me pan katene komail o nikid jan ni me jued. <sup>4</sup>Je kaporoporeki Kaun o re omail, me komail kin dadaurata o pan wiada, me je kakaliki on komail er. <sup>5</sup>A Kaun o en kotin wiawia monion omail, pwe komail en direki limpok en Kot o kanonama en Krijtuj. <sup>6</sup>Ri ai kan, je kakaliki on komail ni mar en atail Kaun Iejuj Krijtuj, me komail en muei jan jaulan karoj, me kin dadaurata padak, me komail roner jan kit. <sup>7</sup>Pwe komail aja duen idedauen kit, pwe kit jota wiadar japun nan pun omail. <sup>8</sup>O je jota ale jan amen kan at mana, ap jota pwaipwai, pwe je dodok apwal ni pon o ni ran, pwe jen der katoutouki amen komail. <sup>9</sup>A kaidin pwe a jota muei on kit, a pwe jen wia kin kit kilel en me komail en alale jan. <sup>10</sup>Pwe ni at mimi re omail, iet me je kakaliki on komail, meamen me kan wia dodok, a pil jota pan mana. <sup>11</sup>Pwe je roner, me akai mi re omail, me kin weweid ni mejued ni ar jolar kin dodok, a re apwali kijin tiak mal. <sup>12</sup>Ari, irail me due met, je indai on o panau irail, pan Kaun Iejuj Krijtuj, me irail en dodok, o nenenla o tunole pein kan ar mana. <sup>13</sup>A komail, ri ai kan, der panki omail wiawia mau. <sup>14</sup>A ma amen kan oke at padak nan kijin likau et, i me komail en kileledi, o komail der apwali i, pwe i en namenokela. <sup>15</sup>A komail der wiaki i imwintiti amen, a jauaja i dueta ri omail amen. <sup>16</sup>A Kaun en popol en pein kotiti on komail popol anjau karoj o ni jon karoj! Kaun o en kotikot re omail karoj! <sup>17</sup>Nai Pauluj ranamau ni manin pa i, me kijin likau karoj kilelekidi, iduen ai intin. <sup>18</sup>Mak en atail Kaun Iejuj Krijtuj en mi re omail karoj!

## Kadede Kap Pjam Akan

The New Testament and Psalms in the Pohnpeian language of the  
Federated States of Micronesia (old translation, using old alphabet)

Public Domain

Language: Pohnpeian

2014-11-10

Updates

[eBible.org](http://eBible.org)

---

PDF generated using Haiola and XeLaTeX on 17 Nov 2018 from source files dated 8 Oct  
2018

1941731f-581e-5815-a2a4-a976cf53af02